

四庫全書

集部

欽定四庫全書

石倉歷代詩選卷一百四

明 曹學佺 編

方外一

吳筠

字貞節  
華陰人

遊仙詩

啟冊觀往載搖懷考今情終古已寂寂舉世何營營悟  
彼九仙妙超然全至精凝神契沖玄化服凌太清心同

宇宙廣體合雲霞輕祥風吹羽蓋慶霄拂霓旌龍駕朝  
紫微後天保常名豈知寰中士軒冕矜暫榮

晨登千仞嶺俯瞰四人居原野間城邑山河分里閭眇  
彼塵埃中爭奔聲利途百齡寵辱盡萬事皆為虛自昔  
無成功安能與爾俱將期駕雲景超竦昇天衢

鸞鳳棲瑤林鵠鶴集平楚飲啄衣殊好翹翔終異所吾  
方遺誼囂立節慕高舉解茲區中戀結彼霄外侶誰謂  
天路遐感通自無阻

碧海廣無際三山高不極金臺羅中天羽客恣遊息霞  
液朝可飲虹芝晚堪食嘯歌自忘念騰舉寧假翼保壽  
同三光安能紀千億

將過太帝宮暫詣扶桑處真童已相迓為我清宿霧海  
若寧洪濤羲和止奔馭五雲結層閣八景動飛輿青霞  
正可挹丹楨時一遇留我宴玉堂歸軒不令遽

欲超洞陽界試鑒丹極表赤帝躍火龍炎官控朱鳥導  
我昇絳府長驅出天杪陽靈正赫暉四達何皎皎為爾

流凱風羣生可無天

予因詣金母飛蓋超西極遂入素天中停輪太濛側若  
華拂流景不使白日匿傾曠復亭午六合無暝色道化  
隨感遷此理詎能測

停驂太儀側整服金闕前肅肅承上帝鏘鏘會羣仙鴻  
臚發靈音廣廡張鈞天玉體洽中座高霞充四筵良期  
無終極俛仰移億年

步虛詞

衆仙仰靈範肅駕朝神宗金景相照耀逶迤昇太空七  
玄已高飛火鍊生朱宮餘慶逮天壤平和王道融八威  
清遊氣十絕舞祥風使我躋陽原其來自陰功逍遙太  
霞上真鑒靡不通

逸轡登紫清乘光邁奔電閻風隔三天俯視猶可見玉  
闔標敞朗瓊林鬱葱蒨自非挺金骨焉得諧夙願真朋  
何森森合景恣遊宴良會忘淹留千齡纔一眄

三宮發明景朗照同鬱儀紛然馭飈歛上採空青駢令

我勸金色後天曜瓊姿心叶太虛靜寥寥意何思玄中  
有至樂澹泊終無為但與正直友飄飄從遨嬉

稟化凝正氣鍊形為真仙忘心符元宗返本叶自然帝  
一集絳宮流光出丹玄無英與桃君朗詠長生篇六府  
煥明霞百闕羅紫煙飈車涉寥廓靡靡乘景遷不覺  
雲路遠斯須遊萬天

扶桑誕初景羽蓋凌晨霞倏歛造西城嬉遊金母家碧  
津湛洪源灼爍敷荷花煌煌青琳宮粲粲列玉華真氣

溢絳府自然思無邪俯矜區中士天濁良可嗟

瓊臺劫為仞孤映大羅表常有三素雲凝光自飛繞羽  
景汎明霞升降何縹渺鸞鳳吐雅音栖翔絳林標玉虛  
無晝夜靈景何皎皎一覩太上京方知衆天小

高清無侈靡遇物生華光至樂非簫歌玉音自玲琅或  
登明真臺宴此羽景堂杳靄結寶雲霏微散靈香天人  
誠多暇歡泰不可量

二氣播萬有化機無停輪而我探其端乃能出陶鈞寥

寥升太漠所遇皆清真澄瑩含元和氣同自相親絳樹  
結丹寶紫霞流碧津願以保童嬰永用超形神

經羊角哀墓作

祇名出江國路傍旌古墳伯桃葬角哀墓近荆將軍神  
道不相得稱兵解其紛幽明信難知勝負理莫分長呼  
遂刎頸此節古未聞兩賢結情愛骨肉何足云遲迴駐  
征騎不覺空林曠

登北固山望海

此山鎮京口迥出滄洲濱躋覽何所見茫茫朝夕池雲  
生蓬萊島日上扶桑枝萬里混一色焉能分兩儀願言  
策煙駕縹渺尋安期揮手謝人境吾將從此辭

過天門山懷友人

舉帆遇風勁逸勢如飛奔縹渺凌煙波崩騰走川原兩  
山夾滄江豁爾開天門須臾輕舟遠想像孤嶼存歸路  
日已近怡然慰心魂所經多奇趣待與吾友論一日如  
三秋相思意彌敦

舟中夜行

榜人識江路挂席從宵征莫辨洲渚狀但聞風波驚陰  
雲正飄颻落月無光晶豈不畏難險所憑在忠誠何時  
達遙夜佇見初日明

晚到湖口見廬山作呈諸故人

夜舟達湖口漸近廬山側高高標橫天隱隱何峻極石  
鏡啟晨暉鑪煙凝寒色旅泊將休暇歸心已躋陟虛名  
久為累使我辭妙域良願道不違幽襟果茲得故人在

雲嶠乃復同宴息鴻飛入青冥誰能擬矰弋

苦春霖作

應龍遷南方霪雨備江干俯望失平陸仰瞻隱崇巒陰  
風斂暄氣殘月淒已寒時鳥戢好音衆芳亦微殘萬流  
注江湖日夜增波瀾數君曠不接悄悄無與歡對酒聊  
自娛援琴為誰彈彈為愁霖引曲罷仍永歎此歎因感  
物誰能識其端寫懷寄同心詞極意未殫

酬葉縣劉明府避地廬山言懷詒鄭錄事昆季

荀尊師

明哲良罕遇遇君輒思齊挺生著天爵自可析人珪河  
洛初沸騰方期掃虹霓時命竟未合安能親鼓鼙從此  
罷飛鳬投簪辭割雞驅車適南土忠孝兩不睽廬岳鎮  
江介於焉愜林栖入門披綵服出谷杖紅藜隱令舊間  
里而今復成躋鄭公解簪紱華萼曜松溪賢哉苟徵君  
滅迹為圃畦顧已誠非薄忝茲忘筌蹄相歡對綠樽逸  
思凌丹梯道泰我長往時清君勿迷王孫且無歸芳草

正萋萋

覽古詩

聖人重周濟明道欲救時孔席不暇煖墨突何嘗綯興  
言振頽綱將以有所維君臣竟淫惑風俗日凋衰三代  
業遽隕七雄遂交馳庶物墜塗炭區中若棼絲秦皇燎  
儒術方冊靡子遺大漢立五葉斯文復崇推乃驗經籍  
道兩世同屯夷弛張固天意設教安能持  
棟宇代巢穴其來自三皇跡生固為累經始增百王瑤

臺既滅夏瓊室復隕湯覆車世不悟秦氏興阿房繼踵  
迷反正漢家策建章力役敝萬人瓊奇殫八方徇志仍  
未極促齡已云亡侈靡竟何在荆榛生廟堂

吾觀采苓什復感青蠅詩讒佞亂忠孝古今同所悲姦  
邪起狡猾骨肉相殘夷漢儲殞江充晉嗣滅驪姬天性  
猶可問君臣固其宜子胥烹吳鼎文種斷越鉢屈原沈  
湘流厥感誠自詒何不若范蠡扁舟無還期

食其昔未遇落魄為狂生一朝君臣契雄辯何縱橫運

籌匡漢業憑軾下齊城既繇智所達還繇智所烹豈若  
終賤貧酣歌本無營

晁錯抱遠策為君納良規削彼諸侯權永用得所宜姦  
臣負舊隙乘釁謀相危世主竟不辨身戮宗且夷漢景  
稱欽明濫罰猶如斯比干與龍逢殘害何足悲

至人順通塞委命固無疵吾觀太史公可謂識道規留  
滯焉足憤感懷殄生涯吾歎襲夫子秉義確不移晦跡  
一何晚天年天當時薰膏自銷鑠楚老空餘悲京房洞

幽贊神奧咸發揮如何疾元惡不悟禍所歸謀物闇謀已誰言爾精微

玄元明知止大雅尚保躬茂先洽聞者幽情咸該通弱年賦鷩鶡可謂達養蒙晚節希鸞鵠長飛唳層穹知進不知退遂令其道窮伊昔辯福初胡為迷禍終方驗嘉遁客永貞天壤同

樊先生

巢父志何遠潛精人莫知恥聞讓王事飲犧方見移不

欲散大朴焉能為堯師鍊真自輕舉浮世何足遺

柏成子高

大禹受禪讓子高辭諸侯退躬適外野放浪夫何求萬  
乘造中畝一言良見酬危耕不顧斯情邈難傳

臧丈人

臧叟隱中壑垂綸心浩然文王感昔夢授政道斯全一  
遵無為術三載淳化宣功成遂不處遁迹符沖玄

伯夷叔齊

夷齊互崇讓棄國從所欽聿來及宗周乃復非其心世  
濁不可處水清首陽岑采薇詠羲農高義越古今

洞靈真人

亢倉致虛極潛迹依遠岫智去愚獨留日虧歲方就鄉  
人謀尸祝不欲聞俎豆尚賢非至理堯舜固為陋

榮啟期

榮期信知止帶索無所求外物非我尚琴歌自優游三  
樂通至道一言醉孔丘居常以待終嘯傲夫何憂

長沮桀溺

賢哉彼沮溺避世全其真孔父栖栖者征途方問津行  
歲既異迹語默豈同倫耦耕長林下甘與鳥雀羣

楚狂接輿夫妻

接輿耽沖玄伉儷亦真逸傲然辭徵聘耕績代祿秩鳳  
歌譏文宣龍德遂隱密一遊峨嵋上千載保靈術

鄭商人弦高

卓哉弦高子商隱獨標奇微謀全鄭國矯命犒秦師賞

祿義不受存公滅其私虛心貴無名遠迹居九夷

漢陰丈人

野哉漢陰叟好古遂忘機抱甕誠亦勤守朴全道微子  
貢初不達聽言識其非已為風波人悅惆失所依

段干木

干木布衣者守道杜衡門德光義且富肯易王侯尊魏  
主欽其賢軾廬情亦敦秦兵遂不舉高卧為國藩

魯仲連

仲連乘竒節釋難舍道情一言却秦圍片札降聊城辭  
金義何遠讓祿心益清處世功已立拂衣蹈滄溟

顏歌

高哉彼顏歌逸氣陵齊宣道尊義不屈士重王來前榮  
祿安可誘保和從自然放情任所尚長揖歸山泉

原憲

原生何淡漠觀妙自怡性蓬戶常晏如弦歌樂天命無  
財方是貧有道固非病木賜欽高風退慙車馬盛

商山四皓

萬方厭秦德戰伐何紛紛四皓同無為丘中卧白雲自漢成帝業一來翼儲君知幾道可尚隱括成元勲

河上公

邈邈河上叟無名契虛沖靈闊暢玄旨萬乘趨道風寵辱不可累飄然在雲空獨與造化友誰能測無窮

嚴君平

漢皇舉遺逸多士咸已寧至德不可拔嚴君獨湛冥卜

筮訓流俗指歸暢玄經閉關動元象何必遊紫庭

司馬季主

季主超常倫沈迹寄卜筮宋賈二大夫停車試觀藝高  
談哂朝列洪辯不可際終秉鸞鳳心翛然已遐逝

鄭子真張仲蔚

子真巖石下仲蔚蓬蒿居禮聘終不屈清貧長晏如忘  
情在耕藝養壽資玄虛至樂非外物道冥歡有餘

嚴子陵

漢皇敦故友物色訪嚴生三聘迨深澤一來過帝庭紫宸同御寢玄象驗客星祿位終不屈雲山樂躬耕

向子平

子平好真隱清淨翫老易探玄樂無為觀象驗損益常抱方外心且紓人間迹一朝畢婚娶五嶽遂長適

高鳳

吾觀時人趣矯迹務馳聲獨有高文通訟田求翳名公車徒見累爵祿非所榮隱身樂漁釣世網不可櫻

孫公和

孫登好淳古卉服從穴居彈琴合天和讀易見象初終  
日無愠色恬然在玄虛貽言誠叔夜超迹安所如

郭文舉

郭生在童稚已得方外心絕跡遺世務栖真入長林元  
和感異類猛獸懷德音不憶固無情斯言微且深

陶徵君

吾重陶淵明達生知止足怡情在樽酒此外無所欲彭

澤非我榮折腰信為辱歸來北窓下仍採東籬菊

出塞

劒頭利如芒恒持照眼光鐵騎追驍帥金羈討黠羌高  
秋八九月北地早風霜男兒不惜死破膽與君嘗

其二

十月繁霜下征人遠鑿空雲搖錦更節海照角端弓暗  
磧埋沙樹衝飈卷塞蓬方隨膜拜入歌舞玉門中

步虛詞

紫府與玄洲誰來物外遊無煩騎白鹿不用駕青牛金化顏應駐雲飛鬢不秋仍聞碧海上更用玉為樓

其二

玉樹雜金花天河織女家月邊丹鳳鳥風送紫鸞車霧縠籠綃帶雲屏列錦霞瑤臺千萬里不覺往來賒

題縉雲嶺永望館

人驚此路險我愛前山深猶恐佳趣盡欲行且沈吟

題華山人所居

故人往南郭邀我對芳樽歡暢日亦暮不知城市喧

別章叟

平昔同邑里經年不相思今日成遠別相對心淒其

韋渠牟

京兆人與  
李白交善

步虛詞三首

玉簡真人降金書道籙通煙霞方蔽日雲雨已生風四  
極威儀異三天使命同那將人世戀不去上清宮

上帝求仙使真符取玉郎三丈闢布象二景鬱生光騎

吏排龍虎笙歌走鳳皇天高人不見暗入白雲鄉

鸞鶴共徘徊仙官使者催香花三洞啟風雨百神來鳳

篆文初識龍泥印已開何須生羽翼始得上瑤臺

廣陵道士

贈劉商

無事到揚州相攜上酒樓藥囊為贈別千載更何求

殷七七

醉歌

琴彈碧玉調藥鍊白硃砂解醞頃刻酒能開非時花

陽春曲

愁見唱陽春令人離腸結郎去未歸家柳自飄香雪

女冠李治

字李蘭

聽從叔琴彈三峽流泉歌

妾家本住巫山雲巫山流泉常自聞玉琴彈出轉寥寥直似當時夢中聽三峽迢迢幾千里一時流入幽閨裏巨石崩崖指下生龍波走浪絃中起初疑噴怒含雷風又似鳴

咽流不通迴湍曲瀨勢將盡時復滴澀平沙中憶昔阮公為  
此曲能使仲容聽不足一彈既罷還一彈願比流泉鎮相續

寄韓校書十七兄

無事烏程縣蹉跎歲月餘不知芸閣吏寂寞意何如遠  
水浮仙棹寒星伴使車因過大雷岸莫忘八行書

送韓揆之西江

相看指楊柳別恨轉依依萬里西江水孤舟何處歸溢  
城潮不到夏口信應稀惟有衡陽雁年年來去飛

送閻二十六赴荊縣

流水閭門外孤舟日復西離情徧芳草無處不萋萋夢經吳苑君行到荊溪歸來重相訪莫學阮郎迷

得閻伯釣書

情來對鏡懶梳頭暮雨蕭蕭庭樹秋莫怪闌干垂玉筋只緣惆悵對銀釣

女冠魚玄機

導懷

閒散身無事風光獨自遊斷雲江上月解纜海中舟琴  
弄昭明寺詩吟瘦亮樓叢篁堪作伴片石好為傳燕雀  
徒云貴金銀志不求滿杯春酒綠對月夜琴幽遠砌澄  
清治抽簪映細流卧牀書冊徧半醉起梳頭

寄劉尚書

八座鎮雄軍歌謠滿路新汾川三月雨晉水百花春圖  
圍長空鎖干戈久覆塵儒僧觀子夜羈客醉紅茵筆硯  
行隨手詩書坐遠身小才多顧盼得作食魚人

賦得江邊柳

翠色連荒岸，煙姿入遠樓。  
影鋪秋水面，花落釣人頭。  
根老藏魚窟，枝低繫客舟。  
瀟瀟風雨夜，驚夢復添愁。

暮春有感寄友人

鶯語驚殘夢，輕粧改淚容。  
竹陰初月薄，江靜晚煙濃。  
濕觜銜泥燕，香鬚採藥蜂。  
獨憐無限思，吟罷亞枝松。

酬李郢夏日釣魚回見示

住處雖同巷，經年不一過。  
清詞勸舊女，香桂折新柯。  
道

性欺冰雪禪心笑綺羅跡登霄漢上無路接煙波

寄國香

旦夕醉吟身相思又此春雨中寄書使窓下斷腸人山捲珠簾看愁隨芳草新別來清宴上幾度落梁塵

早秋

嫩菊含新彩遠山閒夕煙涼風驚綠樹清韻入朱絃思婦機中錦征人塞外天雁飛魚在水書信若為傳

感懷寄人

恨寄朱絃上含情意不任早知雲雨會未歇蕙蘭心月色苔階淨歌聲竹院深門前紅葉地不掃待知音

期友人阻雨不至

雁魚空有信雞黍恨無期閉戶方籠月褰簾已散絲近泉鳴砌畔遠浪漲江濱鄉思悲秋客愁吟五字詩

訪趙鍊師不遇

何處同仙侶青衣獨在家煖爐留煮藥隣院為煎茶畫壁燈光暗幡竿日影斜殷勤重回首牆外數枝花

寄飛卿

階砌亂蛩鳴庭柯煙露清月中隣樂響樓上遠山明珍  
簾涼風著瑤琴寄恨生愁君懶書札底物慰秋情

情書寄李子安

補闕

飲冰食蘖志無功晉水壺關在夢中秦鏡欲分愁墮鵠  
舜琴將弄怨飛鴻井邊桐葉鳴秋雨窓下銀燈暗曉風  
書信茫茫何處問持竿盡日碧江空

和友人次韻

何事能銷旅館愁紅簾開處見銀鈎蓬山雨灑千峰小  
嶰谷風吹萬葉秋字字朝看輕碧玉篇篇夜誦在衾稠  
欲將香匣收藏却且惜時吟在手頭

和新及第悼亡詩

仙籍人間不久留片時已過十經秋鴛鴦帳下香猶暖  
鸚鵡籠中語未休朝露綴花如臉恨晚風欹柳似眉愁  
彩雲一去無消息潘令多情欲白頭

夏日山居

移得仙居此地來  
花叢自遠不曾裁  
庭前亞樹張衣桁  
坐上新泉泛酒杯  
軒檻暗傳深竹逕  
綺羅長擁亂書堆  
閒乘畫舫吟明月  
一任輕風吹却回

暮春即事

深巷窮門少侶  
傳阮郎惟有夢  
中留香飄羅綺  
誰家席風送歌聲  
何處樓街近鼓鼙  
喧曉睡庭閒  
鵲語亂春愁  
安能追逐人間事  
萬里身同不繫舟

代人悼亡

曾覩夭桃想玉姿帶風楊柳認蛾眉珠歸龍窟知誰見  
鏡在鸞飛話向誰從此夢悲煙雨夜不堪吟苦寂寥時

西山日落東山月恨想無因有歇期

和人

茫茫九陌無知己暮去朝來典繡衣寶匣鏡昏蟬鬢亂  
博山爐煖麝煙微多情公子春留句少思文君畫掩扉  
莫惜羊車頻列載柳絲梅綻正芳菲

左名場自澤州至京使人傳語

閒居作賦幾年愁王屋山前是舊遊詩詠東西千嶂亂  
馬隨南北一水流曾陪雨夜交歡席別後花時獨上樓  
忽喜扣門傳語至為憐隣巷小房幽

酬李學士寄簾

珍簾新鋪翡翠樓泓澄玉水記方流惟應雲扇情相似  
同向銀牀恨早秋

遊崇真觀南樓覩新及第題名處

雲峰滿目放春晴歷歷銀鈎指下生自恨羅衣掩詩句

舉頭空羨榜中名

江行

大江橫抱武昌斜  
鸚鵡洲前萬戶家  
畫舸春眠朝未足  
夢為蝴蝶也尋花

聞李端公垂釣回寄贈

無限荷香染暑衣  
阮郎何處弄船歸  
自慚不及鴛鴦侶  
猶得雙雙近釣磯

題隱霧亭

春花秋月入詩篇  
白日青霄是散仙  
空捲珠簾不曾下

長移一榻對山眠

重陽阻雨

滿庭黃菊籬邊折  
兩朵芙蓉鏡裏開  
落帽臺前風雨阻

不知何處醉金杯

送別

秦樓幾夜悵心期  
不料仙郎有別離  
睡覺莫言雲去處  
殘燈一盞野鶴飛

石倉歷代詩選卷一百四

欽定四庫全書

石倉歷代詩選卷一百五

明 曹學佺 編

方外二

釋皎然

字清晝  
吳興人

杼山禪居寄贈東溪吳處士

青雲何潤澤下有賢人隱路入菱湖深迹與黃鶴近野  
風吹白芷山月搖清軫詩祖吳叔庠致君才不盡身當

青山秀文體多郢聲澄澈湘水碧汎寥楚山清時人格  
不同至今罕知名昔賢敦師友此道君獨行既得廬霍  
趣乃高雷遠情別時春風多掃盡雲山雪為君中夜起  
孤坐石上月悠然遺塵想邈矣達性說故人不在茲幽  
悰悄多結

答鄭方回

獨禪外念入中夜不成定顧我顚頷容釋君陽春詠詞  
貞思且逸瓊彩何暉映如聆雲和音况覩聲名盛琴語

掩為聞山聲必宜聽是時寒光澈萬境澄以淨高秋日  
月清中氣天地正遠情偶茲夕道用增寥寥思君處虛  
室一操不可更時美城北徐家承谷口鄭軒車未有轍  
蒿蘭且同逕莊生誠近名夫子罕言命是以耕楚田曠  
然殊獨行歲艱鸞鳳彩特達珪璋性通隱嘉黃綺高儒  
重荀孟世汚我未起道蹇吾猶病逸翮思冥冥潛鱗樂  
游泳宗師許學外恨不逢孔聖說詩迷頽靡偶俗易趨  
競此道共誰詮因君情欲罄

妙喜寺達公禪齋寄李司直公孫房都曹德裕

裴從事方舟顏武康士騁四十二韻

我祖傳六經精義思朝徹方舟頗周覽逸書亦備閱墨  
家傷刻薄儒氏知優劣弱植庶可彫苦心未嘗輟中年  
慕仙術永願傳其訣歲駐若木景日餐瓊禾屑蟬娟羨  
門予斯語豈徒設天上生白榆歲數信好折實可返柔  
顏花堪養玄髮求之性分外業棄金亦竭藥化成白雲  
形彫辭素穴一聞西天旨初禪已無熱涓子非我宗然

公有真訣却尋丘壑趣始與纓紱別野飯敵膏梁山楹  
代藻稅與君比巖侶遊寓日常抉靜對春谷泉晴披陽  
林雪境清覺神王道勝知機滅詣寂長杳冥忘歸整採  
擷物生豈有心麗容俟予別桂子何蓂苓奇葩亦皎潔  
此木生意高亦與衆芳列賞心識屢換省躬悟彌切微  
尚若不虧足以全吾節北風吹蕙帶蕭寥聞蜻蛚宿昔  
廬峰期流芳已再歇不有清屏鑒使我商絃絕願寄千  
里心月高不可掇優游邦之直遠矣踵前烈立俗忘毀

譽遇物遺巧拙真氣獨翛然軒裳詎能繼都曹風韻整  
綱紀信明決於交必傾寫立行豈矜伐政與清渭同分  
流自澄澈裴侯資亮直中誠豈徒說古人比明義清士  
願交結溫溫躬珪彩終始聲不缺顏生惆介士有志不  
可越仗義曷險艱持操去緇涅世論高二顏賢賢繼前  
哲四子遭明盛哀然皆秀傑埋名雖殊迹悟道寧異轍  
愛爾竹栢姿為予寒不折

遙酬袁使君高春暮行縣過報德寺見懷

江春行求瘼偶與真境期見說三陵下前朝開佛祠停  
舟仰麗刹繡組發香墀咫尺空界色天人花落時盛遊  
限羸疾悚踴瞻旌旗峰翠羨閒步松聲入遙思素高淮  
陽理况負東山姿迨此一登覽深情見新詩

戲呈吳馮

予讀古人書遂識古人面不是識古人邪正心自見貴  
義輕財求俗譽一錢與人便驕倨昨朝為火今為冰此  
道非君獨撫膺

奉和崔中丞使君論李侍御登爛柯山石橋寺

效小謝

常愛謝公郡，幽期願相從。  
果迴青驄臆，共躡玄仙蹤。  
靈境若髡髨，爛柯思再逢。  
飛梁丹霞接，古局蒼苔封。  
往想冥昧理，誰親冰雪容。  
蕙棲聳空界，蓮宇開中峰。  
昔化沖虛鶴，今歲護法龍。  
雲窺香樹杳，月見色天重。  
永夜寄岑寂，清言滌心胸。  
盛遊千年後，書在巖中松。

夏日題桐廬楊明府納涼山齋

陶家無炎暑自有林中峰席上落山影桐梢迴水容放  
懷涼風至緩步清陰重何事親堆案猶多高世蹤

夏日與綦母居士昱上人納涼

為依鑪峰住境勝增道情涼日暑不變空門風自清坐  
援香實近轉愛綠蕪生宗炳青霞士如何知我名

新秋送盧判官

故人念宿昔欲別增遠情入座炎氣屏為君秋景清由  
來空山客不怨離絃聲惟有暮蟬起相思碧雲生

送崔判官還揚子

輕傳低遠役依依下姑亭秋聲滿楊柳暮色繞郊坰  
水搖歸思山當楚驛青

御招三韻

秋風怨別情江守上西城竹暑寒流淺琴窓宿雨晴治  
書招遠意知共楚狂行

送清源上人

何意欲歸山道高由境勝花空覺性了月靜知心證永

夜出禪吟清猿自相應

水月

夜夜池上觀禪身坐月邊虛無色可取皎潔意難傳若向空心了長如影正圓

往丹陽尋陸處士不遇

遠客殊未歸我來幾惆悵叩關一日不見人繞屋寒花笑相向寒花寂寂徧荒阡柳色蕭蕭愁暮蟬行人無數不相識獨立雲陽古驛邊鳳翅山中思本寺魚竿村口

望歸船歸船不見見寒煙離心遠水共悠然他日相期  
那可定閒僧著處即經年

買藥歌送楊山人

華陰少年何所希欲餌丹砂化骨飛江南藥少淮南有  
暫別胥門出京口京口斜通江水流徘徊應上青山頭  
夜驚潮沒鷓鴣堰朝看日出芙蓉樓蕩漾春風亂帆影  
片雲無數是揚州揚州喧喧賣藥市浮俗無由識仙子  
河間姹女直千金紫陽夫人服不死吾於此道復何如

昨朝新得蓬萊書

顧渚行寄裴方舟

我有雲泉隣渚山。山中茶事頗相關。鶲鳴時芳草死。  
山家漸欲收茶子。伯勞飛日芳草滋。山僧又是採茶時。  
由來慣採無近遠。陰嶺長兮陽崕淺。大寒山下葉未生。  
小寒山中葉初卷。吳姬攜籠上翠微。蒙蒙香刺鬚春衣。  
迷山乍被落花亂。度水時驚啼鳥飛。家園不遠乘露摘。  
歸時露彩猶滴瀝。初看抽出欺玉英。更取煎來勝金液。

昨夜西風雨色過朝尋新茗復如何女宮露潤青芽老  
堯市人稀紫笋多紫笋青芽誰得識日暮採之長太息  
清冷真人待予元貯此芳香思何極

支公詩

支公養馬復養鶴率性無機多脫略天生支公與凡異  
凡情不到支公地得道由來天上仙為僧却下人間寺  
道家諸子論自然此公惟許逍遙篇山陰詩友誼四坐  
佳句縱橫不廢禪

山雨

一片雨山半晴長  
風吹落西山上滿樹蕭蕭心耳清雲  
鶴驚亂下水香凝不然風迴雨定芭蕉濕一滴時時入  
畫禪

述夢

夢中歸見西陵雪渺渺茫茫行路絕覺來還在剝東峰  
鄉心繚亂愁夜鐘寺北禪岡猶記得夢歸長見山重重  
山中月夜寄無錫長官

湖上涼風早雙峰月色秋遙知秣陵令今夜在西樓別  
葉蕭蕭下含霜處處流如何共清景異縣不同遊

晚秋登佛川南峰懷裴例

登嶺望落日渺然傷別魂亭皋秋色徧遊子在荆門世  
故東西客山空斷續猿此心誰復見寂寞偶芳荪

和裴少府懷京兄弟

宦遊三楚外家在五陵原涼夜多歸夢秋風滿故園北  
書無遠信西候獨傷魂空念青門別殷勤岐路言

和閻士和望池月答人

片月忽臨池雙蛾憶畫時光浮空似粉影散不成眉孤  
枕應驚夢寒林正入帷情知兩處望莫怨獨相思

奉同盧使君幼平遊精舍寺

影刹西方在虛空翠色分人天霽後見猿鳥定中聞真  
界隱青壁春山凌白雲今朝石門會千古仰斯文

和邢端公登臺春望句句有春字之什

春日繡衣輕春臺別有情春煙間草色春鳥隔花聲春

樹亂無次春山遙得名春風正飄蕩春甕莫須傾

獨遊二首

性野趣無端春晴路又乾逢泉跋石弄放鶴向雲看好  
僻誰相似從狂我自安芳洲亦有意步上白沙灘

臨水興不盡虛舟同可嬉還雲與歸鳥若共山僧期世  
事吾不預此心誰得知西峰有禪老應見獨遊時

遊溪寺待月

溪色思泛月沿洄欲未歸殘燈逢水店踈磬憶山扉夜

浦魚驚少空林鵠遠稀可中纔望見撩亂擣寒衣

夏日集裴錄事北亭避暑

前林夏雨歇為我生涼風一室煩暑外衆山清景中忘  
歸親野水適性許雲鴻蕭散都曹吏還將靜者同

湯評事衡水亭會覺禪師

山侶相逢少清晨會水亭雪晴松葉翠煙暖藥苗青靜  
對滄洲鶴閒看古寺經應憐叩關子了義共心冥

與朝陽山人張朝夜集湖亭賦得各言其志

洞庭孤月在秋色望無邊零露積衰草寒螿鳴古田荒  
茫區中想寂寂塵外緣從此悟浮世胡為傷暮年

寒食日同陸士行報德寺宿解公房

古寺章陵下潛公住幾年安心生輭草灌頂引春泉寂  
寂傳燈地寥寥禁火天世間多暗室白日為誰懸

早秋桐廬思歸示道諺上人

桐江秋信早憶在故山時靜夜風鳴磬無人竹掃墀猿  
來觸淨水鳥下啄寒梨可即關吾事歸心自有期

勞勞山居寄程處士

山事由來別只應中老身寒園掃綻栗秋浪拾乾薪領  
鶴閒書竹誇雲笑向人俗家相去遠野水作東隣

酬別襄陽詩僧少微

詩中答上人  
歸夢之意

證心何有夢示說夢歸頻文字齋秦本詩騷學楚人蘭  
開衣上色柳向手中春別後須相見浮雲是我身

送契上人遊

西遊古江口遠見東楊州綠水不同汎春山應獨遊尋

僧白巖寺望月謝家樓宿昔心期在人寰非久留

送沈秀才之閩中

越客不成歌春風起綠波嶺重寒不到海近瘴偏多野  
戍桄榔發人家翡翠過翻疑此中好君問定如何

送清會上人遊

佳遊限衰疾一笑向西風思見青門外曾遊素滙東峰  
明雲際寺日出露寒宮行道禪長在香塵不染空

沈居士還太原

辭鄉因世難家族盛南朝名重郊居賦才高獨酌謠浪  
花飄一葉峰色向三條高逸雖成性弓旌肯忘招

兵後送姚太祝赴選

兩河兵已偃處處見歸舟日夜故人散江皋芳樹秋楚  
雲傷遠思秦月憶佳遊名動春官籍翩翩才少傳

啼猿送客

萬里巴江水三聲月峽深何年有此路幾客共沾襟斷  
壁分垂影流泉入苦吟淒涼離別後聞此更傷心

宿吳匡山破寺

雙峰百戰後真界滿塵埃蔓草緣空壁悲風起古臺野  
花寒更發山月暝還來何事池中水東流獨不回

送重鈞上人遊天台

漸看華頂出幽意尚隨生十里行松色千重過水聲海  
容雲正盡山態雪初晴事事將心證知君道可成

送劉司法之越州

蕭蕭鳴夜角驅馬背城濠雨後寒流急秋來朔吹高三

山期望海八月欲觀濤幾日西陵路應逢謝法曹

送簡棲上人之建州觀使君舅

亂峰江上色羨爾及秋行釋氏推真子郗家許貴甥  
覩花新雨淨帆葉好風輕千里依元舅迴潮亦有情

同顏使君清明遊因送蕭主簿

誰知賞嘉節別意忽相和暮色汀州徧春晴楊柳多高  
城戀旌旆極浦宿風波惆悵支山月今宵不再過

送贊上人還京

久遊春草盡還寄北船歸沙鳥窺中食江雲滿淨衣秦  
原山色近楚寺磬聲微見說翻經館多聞似爾稀

送廣通上人遊江西

香爐七嶺秀秋色九江清自古多禪隱吾常愛此行尋  
師經鄂渚受請到青城離別人間事何關道者情

送李秀才赴婺州招

山開江上色孤賞去應遲渌水近吳榜秋風入楚詞猿  
清獨宿處木落遠行時見說東陽守登樓為爾期

送李季良北歸

風吹殘柳綠孤客欲歸時掩抑楚絃絕離披湘葉衰前  
軍猶轉戰故國眇難期北望雁門雪空吟平子詩

送至洪沙彌上元受戒上元江中蔡州有梁戒

壇

不肯資章甫勝衣披木蘭今隨秣陵信欲及蔡州壇野  
寺鐘聲遠春山戒足寒歸來次第學應見後心難

送王山人遊廬山

千里訪靈奇山資亦共隨葉舟過鶴市花漏宿龍池峰  
頂應閒散人間足別離白雲將世事吾見爾心知

詠數探得七

鄒子談天歲黃童對日年求真初作傳鍊魄已成仙鶴  
駕迎緜嶺星橋下蜀川逢君竹林客相對弄清絃

題餘不溪廢寺

武原離亂後真界積塵埃殘月生秋水悲風起故臺居  
人今已盡栖鵠暝還來不到無生理應堪賦七哀

冬日遙和盧使君幼平某母居士遊法華寺高

嶺臨湖亭

仁坊標絕境，廬守躡高蹤。  
天曉纔分刹，風傳欲盡鐘。  
城中歸客遠，湖上碧山重。  
水照千花界，雲開七葉峰。  
寒空艾綬滿，空翠白綸濃。  
逸韻知難繼，佳遊恨不逢。  
仍聞撫禪石，為我久從容。

冬日送顏延之明府撫州觀叔父

臨川千里別，惆悵上津橋。  
日暮人歸盡，山空雪未銷。  
鄉

心雲渺渺楚水路遙遙林下方歡會山中獨寂寥天寒  
驚斷雁江信望迴潮歲晚流芳歇思君在此宵

秋日遙和盧使君遊何山寺宿歇上人房論涅

槃經義

江郡當秋景期將道者同迹高憐竹寺夜靜賞蓮宮古  
磬清霜下寒山曉月中詩情緣境發法性寄筌空翻譯  
推南本何人繼謝公

日曜上人還潤州

送君何處最堪思孤月停空欲別時露茗猶芳邊重會  
寒花落盡不成期鶴令先去看山近雲愛初飛到寺遲  
莫倚禪功放心易蕭家陵樹誤人悲

春日杼山寄李縱員外

南山惟與北山隣古樹連拳伴我身黃鶴有心多不住  
白雲無事獨相親閒持竹錫深看水懶著麻衣出見人  
欲綴幽芳聊贈送郎官那賞石門春

酬泰山人贈別

知君高隱占賢星  
卷葉時時注佛經  
姓被名公題舊里  
詩將麗句號新亭  
來觀新月依清室  
欲漱香泉護淨瓶  
我有主人江太守  
如何相伴住禪靈

山居示靈澈上人

晴明路出山初暖  
行踏春蕪看茗歸  
乍削柳枝聊代札  
時窺雲影學裁衣  
身閒始覺隱名是  
心了方知苦行非  
外物寂中誰似我  
松聲草色共無機

秋居法葉寺下院望高頂贈如獻上人

峰色秋天見松聲靜夜聞影孤長不出行道在深雲

送僧遊揚州

平明擇鉢向風輕正及隋堤柳色行知爾禪心還似我

故宮春物肯傷情

寺院聽胡笳送李殷

一奏胡笳客未停野僧還欲廢禪聽難將此意臨江別  
無限春風葭菼青

送僧繹

斜日搖揚在柳絲孤亭寂寂水逶迤誰堪別後行人盡  
惟有春風起路歧

送文會上人還富陽

悠悠渺渺屬寒波故寺思歸意若何長憶孤舟二三月  
春山偏愛富春多

送僧之京師

縵縵渺渺楚雲繁萬里西歸望國門禪子初心易悽斷  
秋風莫上少陵原

長門怨

春風日日閉長門，搖蕩春心似夢魂。  
若遣花開只笑妾，不知桃李自無言。

赤松

綠葉蒙籠出見天，晴沙瀝瀝水濺濺。  
何處羽人長洗藥，殘花無數逐流泉。

送履霜上人還金陵西山

攜錫西山步綠莎，禪心未了柰情何。  
湘宮水寺清秋夜，

月落風悲松柏多

送辯聰上人還廣陵

莫學休公學遠公了心須與我心同隋家古柳數株在  
看取人間萬事空

送清勵上人遊福建

禪子自矜禪性成將來擬照建溪清南看閩樹花不落  
更取何緣了妄情

送柳察諫議叔

東城南陌強經過  
怨別無心亦放歌  
明日院公應問我  
閒雲常在石門多

冬日梅溪送裴方舟之宣州

平明匹馬上村橋  
花發梅溪雪未消  
日短天寒愁送客  
楚山無限路遙遙

法華寺上方題江上人禪室

路入松聲遠更奇  
山光水色共參差  
中峰禪寂一僧在  
坐對梁朝老檜枝



石倉歷代詩選卷一百五

欽定四庫全書

集部

石倉歷代詩選卷一百

六至十一

詳校官庶吉士臣范蓬恩

侍讀臣孫球覆勘

總校官進士臣朱齡

校對官中書臣孫球

謄錄監生臣李炎

欽定四庫全書

石倉歷代詩選卷一百六

明曹學佺編

方外三

釋靈一

仰詠遠公

遠公逢道安一朝棄儒服真機久消歇世教空拘束誓入羅浮中遂栖廬山曲禪經初纂定佛語新名目鉢帽

絕朝宗簪裾翻拜伏東林多隱士為我辭榮祿

酬皇甫冉將赴無錫于雲門寺贈別

湖南通古寺來往意無涯欲識雲門路千峰到若耶春  
山子敬宅古木謝敷家自可長偕隱那言相去賒

宜豐新泉

泉源新湧出洞澈映纖雲稍落芙蓉沼初淹苔蘚文素  
將空意合淨與衆流分每到清宵月泠泠夢裏聞

同使君宿大梁驛

旌旗江上出花外捲簾空夜色臨城月春寒度水風雖  
然行李別且喜語音同若問匡廬事終身愧遠公

靜林寺

靜林溪路遠蕭帝有遺踪水擊羅浮磬山鳴于闐鐘燈  
傳三世火樹老五株松無數煙霞色空聞昔卧龍

自大林與韓明府歸郭中精舍

野客同舟楫相攜復一歸孤煙生暮景遠岫帶春暉不  
道還山是誰云向郭非禪門有通隱喧寂共忘機

贈靈徹禪師

禪師來往翠微間  
萬里千峰到荆山  
何時共到天台裏  
身與浮雲處處閒

題三僧院

虎溪閒月引相過  
帶雪松枝挂薜蘿  
無限青山行欲盡  
白雲深處老僧多

宿靜林寺

山寺門前多古松  
溪行欲到已聞鐘  
中宵引領尋高頂

月照雲峰凡幾重

釋無可

送呂郎中赴滄州

出守滄州去西風送旆旌路遙經幾郡地盡到孤城拜  
廟千山綠登樓徧海青何人共東望日向積濤生

書馬如文石門居

別業見高致暮泉喧客亭林迥天闕近雨過石門青野  
果誰來拾山禽獨卧聽要迎文會友時復掃柴局

送章正字秩滿東歸

朝衣登別席春色滿秦關芸閣吏誰替海門身又還尋  
僧流水僻見月遠林間雖是忘機者難齊去住間

賦得望遠山送客歸

遙山寒雨過正向暮天橫隱隱凌雲出蒼蒼與水平何  
時凝厚地幾處映孤城歸客秋風裏迴看傷別情

送宜春裴宰是將軍吳之孫

垂白方為縣從知大父雄山春南去棹楚夜北飛鴻置

嶂和雲滅孤城與嶺通誰知持惠化一境動清風

秋夜寄青龍寺空真二上人

夜來思道侶木葉向人飄精舍池邊古秋山樹下遙磬  
寒能幾里雲白已經宵未得同居止蕭然自寂寥

經貞女祠

李常侍書堂

結構因墳籍簷前竹未生塗油窓日早闌繢幌風輕急  
架蛩驚客垂燈雨過城已應窮古史師律可齊名

送薛重中丞充太原副使

中丞出華省副相晉陽行書答偏州啟籌參上將營踏  
沙秋馬細吹雨曉笳清正報胡塵滅桃花汾水生

冬夜姚侍御宅送李廓少府

王事圭峰下將還禁漏餘偶歡新歲近惜別後期踈雪  
罷見來吏川昏即整車獨吟多暇日應寄栢臺書

送沅江宋明府即開府璟之孫

初聞從事日鄂渚動芳菲一遂鈞衡薦今為長吏歸人

臨沅水望雁映楚山飛惟有傳聲政家風重發揮

送顥法師往太原講兼呈李司徒

近臘辭精舍并州謁尚公路長山忽盡塞廣雪無窮講  
席開晴壘禪衣涉遠風聞經諸弟子應滿此門中

過杏溪寺寄姚員外

門逕衆峰頭盤巖復轉溝雲僧隨樹老杏水落江流猿  
狹有時到秦人今日遊謝公多晚望此景在南樓

中秋月

蟾宜天地靜三五對階蓂照耀超諸夜光芒掩衆星影  
寒池更澈露冷樹銷青枉值中秋半長乖宿洞庭

送朴山人歸日本

海霽晚帆開應無鄉信催水從荒外積人指日邊回望  
國乘風久浮天絕島來儻因華夏使書札轉悠哉

送姚宰任吉州安福縣

落絮滿衣裳攜琴問酒鄉挂帆南入楚到縣半浮湘吏  
散翠禽下庭閒斑竹長人安宜遠步沙上蕙蘭香

送李少府之任臨卽

卽南方作尉調補一何卑發論惟公幹承家乃帝枝山  
長風裹棧江蔭石和嘶舊井王孫宅還尋獨有期

遊山寺

千峰路盤盡林寺昔何名步步入山影房房聞水聲多  
年人跡斷殘照石陰清自可求居止安閒過此生

酬姚員外見過林下

掃苔迎五馬時藥過申鐘鶴共林僧見雲隨野客逢入

樓山隔水滴旆露垂松日暮題詩去空知雅調重

送人罷舉東遊

東堂今已負況此遠行難燕雨風聲過連天草色乾鴻嘶荒壘閉兵燒廣川寒若向龍門宿懸知拭淚看

全州冬月陪太守遊池

殘臘雪紛紛林間起送君苦吟行迥野投跡向寒雲絕頂晴多去幽泉凍不聞惟應草堂寺高枕脫人羣

寄清龍寺原上人

斂屨入寒竹安禪過漏聲高杉殘子落深井凍痕生擺  
磬風枝動懸燈雪屋明何當招我宿乘月上方行

秋寄從兄賈島

暝虫喧暮色默思坐西林聽雨寒更徹開門落葉深昔  
因京邑病併起洞庭心亦是吾兄事遲迴共至今

新年

燃燈朝復夕漸作長年身紫閣無歸路青門又見春掩  
關寒過盡開定草生新自有林中趣誰驚歲去頻

暮秋宿友人居

招我郊居宿開門但苦吟秋眠山燒盡暮歇竹園深寒  
浦鴻相叫風窓月欲沈翻嫌坐禪石不在此松陰

送李騎曹之武寧

一歲一歸寧涼天數騎行河來當塞曲山遠與沙平縱  
獵旗風卷聽笳帳月生新鴻引寒色迴日滿京城

秋日寄勵玄先輩

楊柳起秋色故人猶未還別離俱自老少壯豈能閒夜

雨吟殘燭秋城憶遠山何當一相見語默此林間

題青龍寺縱公房

從誰得法印不離上方傳夕磬城霜下寒房竹月圓煙  
殘衰木畔猿住積雲邊未隱滄洲去時來此地禪

贈圭峰禪師

絕壑禪牀底泉分落石層霧交高頂草雲隱下方燈朝  
滿傾心客谿連學道僧半旬持一食此事有誰能

金州別姚合

日日西亭上春留到夏殘言之離別易勉以道途難山  
出一千里溪行三百灘松間樓際月秋入五陵看

夏日送田中丞赴蔡州

出守汝南城應多戀闕情地遙人久望風起旆初行楚  
廟繁蟬斷淮田細雨生賞心知有處蔣宅古津平

蘭

蘭色結春光氣氤掩衆芳過門階露葉尋澤逕連香畹  
靜風吹亂亭秋雨引長靈均曾采擷紉佩掛荷裳

隕葉

遶巷夾溪紅蕭條逐北風別林遺宿鳥浮水載鳴虫石  
小埋初盡枝長落未終帶霜書麗什閒讀白雲中

行漢水晚次神灘阻風

驚風山半起舟子忽停橈岝崿吹先亂灘聲落更跳聽  
松今欲暮過島或明朝若盡平生趣東浮看石橋

送田中丞使西戎

朝元下赤墀玉節使西夷關隴風迴首河湟雪灑旗磧

沙行幾月戎帳到何時應盡平生志高全大國儀

送董正字歸覲毘陵

覽辭讎校去未發見新鴻路入江波上人歸楚邑東山  
遙晴出樹野極暮連空何以念兄弟應思潔膳同

送靈武李侍御

靈州天一涯幕客似還家地得江南壤程分磧裏砂禁  
鹽調上味麥穗結秋花前席因籌畫清吟塞日斜

酬厲侍御秋中思歸樹石所居見寄

三峰居接近數里躡雲行探去通仙境思歸厭宦名月  
從高掌出泉向亂松鳴坐石眠霞侶秋來短褐成

寄興善寺崔律師

沐浴前朝像深秋白髮師從來居此寺未省有東池幽  
石叢圭片孤松動雪枝頃曾聽道話別起遠山思

送清散遊太白山

卷經歸太白躡蘚別蘿龕若履浮雲上須看積翠南倚  
身松入漢暝日月離潭此境堪長往塵中事可諳

送契公自桂陽赴南海

南行登嶺首與俗洗煩埃磬罷孤舟發禪移積瘴開中  
餐湘鳥下朝講海人來莫便將經卷炎方去不迴

冬日與諸公會宿姚端公宅懷永樂殷侍御  
柱史靜開筵所思何地偏故人為縣吏五老遠峰前賓  
榻寒侵樹公庭夜落泉會當隨假務一就白雲禪

送姚明府赴招義縣

濠梁古縣城結束赴王程道路攜家去波濤隔月行車

臨芳草下吏踐落花迎暮郭山遙見春洲鳥不驚風煙  
譙國遠桑柘楚田平何以書能化長淮澈海清

送韓校書赴江西

車馬東門別揚帆過楚津花繁期到幕雪在已離秦吟  
落江沙月行飛驛騎塵猿聲孤島雨草色五湖春折葦  
鳴風㟁遙煙起暮蘋鄱江連郡府高興寄何人

送李使君赴瓊州兼五州招討使

分竹雄兼使南方到海行臨門雙旆引隔嶺五州迎猿

鶴同枝宿蘭蕉夾道生雲垂前騎失山豁去帆輕雨霧  
蒸秋㟁江濤震夜城政閒開迴閣欹枕島風生

送杜司馬再遊蜀中

為客應非願愁成欲別時還遊蜀國去不惜杜陵期劔  
水啼猿在關林轉棧遲日光低峽口雨勢出峨眉山迴  
逢殘角雲開識遠夷勿令雙鬢髮併向錦城衰

寄羽林盧大夫

將軍直禁闈繡服耀金羈羽衛三天靜英豪四塞知望

雲回朔雁隔水射宮麋舊國無歸思秋堂夢戰時門風  
荀氏敵鋒藝霍家推計日旌旄下蕭蕭萬馬隨

惟審

賦得黃鳥啼

捲簾清夢後芳樹引流鶯隔葉傳春意穿花送曉聲未  
調雲路翼空負桂枝情莫盡關關興羈愁厭忽生

春日旅懷呈知己

生涯萬事有蒼蒼應逐流萍任各方春水獨行人漸遠

故園歸夢夜空長一燈隔浦猿孤嘯數點驚心淚滿裳  
不為知音憐范叔信誰江上問行藏

靈徹字澄源會稽人

聽鶯歌

新鶯傍簷曉更悲孤音清冷轉素枝口邊血出語未盡  
豈是怨恨人不知不食枯桑甚不銜苦李花偶然弄樞  
機宛轉凌煙霞衆雛飛鳴何跕促自覘游蜂啄枯木玄  
猿何事朝夜啼白鶯長在汀洲宿黑鵠黃鶴豈不高金

籠玉鈎傷羽毛三江七澤去不得風煙日暮生波濤飛  
去來莫上高城頭莫下空園裏城頭鷗鳥拾羶腥空園  
燕雀爭泥滓願當結舌舍白雲五月六月一聲不可聞

送鑒供奉歸蜀寧親

林間出定戀庭闈聖主恩深暫許歸雙樹欲辭金錫冷  
四花猶向玉階飛梁山拂漢分清境蜀雪和煙惹翠微  
此去不須求綵服紫衣全勝老萊衣

九日和于使君上京

清晨有高會賓從出東方楚俗風煙古汀洲水木涼山  
情來遠思菊意在重陽心憶華池上從容鶴鷺行

宿東林寺

天寒猛虎嘯巖穴林下無人空有月千年像教今不聞  
焚香獨為鬼神說

東林寺酬韋丹刺史

年老身閒無外事麻衣草座亦容身相逢盡道休官去  
林下何曾見一人

答徐廣叔四問

童子出家無第行隨師乞食遣稱名長沙豈敢論年幾  
絳老惟知甲子生

歸湖南

山邊水邊待月明暫向人間借路行如今還向山邊去  
只有湖水無路行

簡寂觀

古松古柏巖壁間猿攀鶴巢古枝折五月有霜六月寒

時見山翁來取雪

遠公墓

古墓石稜稜寒雲晚景凝空悲虎溪月不見雁門僧

天台山華頂峰

天台衆峰外華頂當寒空有時半不見崔嵬在雲中

石倉歷代詩選卷一百六

欽定四庫全書

石倉歷代詩選卷一百七

明 曹學佺 編

方外四

釋護國

江南人  
大歷僧

歸山作

誼靜各有路偶隨心所安縱然好朝市終不忘林巒四皓將拂衣二疎能挂冠窓前隱逸傳每日三時看蘄尚

那可論屈原亦可歎至今黃泉下名及青雲端松牖見  
初月花間禮古壇何處論心懷世上空漫漫

別盛安

情人取次幾淹留別後南州與北州月色為憐今夜客  
砧聲那似去年秋欲除豺虎論三略莫對雲山詠四愁  
親故相逢休借問古來無種是王侯

逢靈道士

浮丘山上見黃冠松柏森森步古壇一莖青竹以為杖

數顆仙桃仍未餐長安市裏方賣卜武陵溪畔每燒丹  
縮地往來無定所花源到處路漫漫

傷蔡處士

篋中遺草是琅玕對此空令灑淚看三逕尚餘行迹在  
數螢猶是映書殘晨光不借泉門曉暝色惟添隴樹寒  
欲問皇天天更遠有才無命說應難

訪雲母山僧

森然古巖裏淨行一番僧松下瀘寒水佛前燒夜燈蓮

花國土異貝葉梵書能想到空王境無心問愛憎

題王班水亭

湖上見秋色曠然如爾懷豈惟歡隴畝兼亦外形骸待  
月歸山寺彈琴坐暝齋布衣閒自貴何用謁天階

許州鄭使君孩子

毛骨貴天生肌膚片玉明見人空解笑弄物不知名國  
器嗟猶小門風望益清抱來芳樹下時引鳳雛聲

愴故人舊居

惆悵至日暮寒鴉啼樹林破階苔色厚殘壁雨痕深  
命與時不遇年為病所侵空餘行逕在今我歎人琴

臨川道中

出谷入谷路回轉秋風已至歸期晚舉頭何處望來蹤  
萬仞千山鳥飛遠

清塞

留辭杭州姚合郎中

波濤千里隔抱疾亦相尋會宿逢高燒辭歸值積霖叢

桑山杏迥孤燭海船深尚有重來約知無省閑心

送分定歸靈夏

南遊多老疾見說講經稀塞寺幾僧在關城空自歸帶  
河衰草斷映月早沙飛却到禪齋後邊軍識衲衣

酬吳之間見贈

已當鳴雁夜多事不同居故疾離城晚秋林見月疎  
趁鐘關靜戶帶葉卷殘書盪槳朝南去荒園久廢鉏

冬日山居思鄉

太野始嚴凝雲天曉色澄樹寒稀宿鳥山迴少來僧背  
日收窓雪開爐釋硯冰忽然歸故國孤想寓西陵

送耿山人歸湖南

南行隨老僧舊業一池菱兩鬢已垂雪五湖歸挂聳夜  
濤鳴柵鎖寒葦露船燈此去應無事却來期未能

柏巖禪師

野寺絕依念空山曾徧行老來披衲重病起讀經生乞  
食嫌村遠尋溪愛路平多年柏巖住不識柏巖名

宿開元寺樓

西峰殘日落誰見寂寥心孤枕客眠久兩廊僧話深寒  
扉關雨氣風葉隱鐘音此愛東樓望仍期別夜尋

留別南徐故人

三年蒙見待此夕是前程未斷却來約且伸臨去情潮  
回灘鳥下月上客船明他日南徐道緣君又重行

春日重至南徐舊居

綠水陰空院春深喜再來獨眠從草長留酒看花開過

雨遠山出向風孤鳥回忽思秋夕事雲物却悠哉

題何氏池亭

信是虛閒地亭亭亦有苔繞池逢石坐穿竹引山回果落纖萍散龜行細草開主人偏好事終不厭頻來

贈慶餘投書

風泉盡結冰寒夢徹西陵越信楚城得遠懷中夜興樹停沙島鶴茶會石橋僧寺閣連官舍行吟過幾層

尋北岡韓處士

相遇值早涼松帚掃山房坐石泉痕黑登城鮮色黃逆  
風沈寺磬初日耀鄰桑幾處逢僧說期來宿北岡

逢樞公

帶酒稀相見西城早晚來衲衣風壞帛香印雨沾灰坐  
久鐘聲盡談餘嶽影回却思同宿夜高枕話天台

入靜隱寺途中作

亂雲迷遠寺入路認青松鳥道緣巢影僧鞋印雪蹤草  
煙連野燒溪霧隔霜鐘更遇樵人問猶言過幾峰

玉芝觀王道士

四面松杉合空堂  
畫老仙蠹根停雪水  
曲角積茶煙道至  
機心盡宵清琴韻全  
暫來還又去不得坐經年

出關後寄賈島

故國知何處  
西風已度關  
歸人值落葉  
遠路入寒山  
多難喜相識  
久貧寧自閒  
惟將來往信  
遙慰別離顏

春喜友人至山舍

鳥鳴春日曉  
喜見竹門開  
路自高巖入  
人騎瘦馬來  
折

花林影動移石澗聲回更欲留深語重城暮色催

書實上人房

絕頂言無伴長懷落髮師齋歸門掩雪講徹樹生枝沙井泉澄疾秋鐘韻盡遲里中還受請又爽赤城期

早秋過郭涯書堂

暑消岡舍清閒語有餘情石水生茶味松風減扇聲遠分臨海雨靜覺掩山城此地秋吟苦時來遙菊行

送表兄東南遊

山水疊層層吾兄涉又登挂帆春背雁尋磬夜逢僧雪溜懸南嶽江雲蓋秣陵評文永不忘此說是中興

晚秋江館寄姚郎中

病寄曲江居帶城傍門孤柳一蟬鳴澄波月上見魚擲荒逕葉乾聞犬行越島夜無侵閣色寺鐘閒有隔源聲故園賣盡休歸去湖水秋來空自平

同處士秋懷少室故居

曾居少室黃河畔秋夢長懸未得回扶病半年離水石

思歸一夜隔風雷荒齋幾遇僧眠後野菊頻經鹿踏來  
燈下此心君共說傍松幽宅幾多苔

寄新頭陀

見說北京尋祖後瓶盂自挈遼窮邊相逢竹塢晦暝夜  
一別苦溪多少年遠洞省穿湖底過斷崖曾向壁中禪  
青城不得師同住坐想滄江意浩然

湘漢旅懷傑公

一室空江聽急流仍同賈客坐歸舟遠書來隔巴陵雨

衰鬢去經彭蠡秋不擬為身謀舊業終期斷穀隱嵩丘  
吾宗尚作無寥者中夜廢吟生旅愁

寄韓司兵

多病十年無舊識滄州亂後始逢君已知罷秩辭瀧水  
相勸移家住嶽雲泗上旅帆侵疊浪雪中歸路踏荒墳  
更為此別愁應老書劄何由到北軍

贈厲玄侍御

山松徑與瀑泉通巾舄行吟想越中塞雁去經華頂末

鄉僧來自海濤東  
關分河漢  
秋鐘絕  
露滴獮猴夜  
獄空抱疾因尋周柱史  
杜陵寒葉落無窮

送韓評事

門枕平湖秋景好  
水煙松色遠  
相依罷官餘俸租田種  
送客回舟載石歸  
離岸遊魚逢浪返  
望巢寒鳥逆風飛  
嵩陽舊隱多時別  
閉目閒吟憶翠微

宿隱靜寺上方

一宿五峰杯渡寺  
虛廊中夜磬聲分  
疎林未落上方月

深澗忽生平地雲  
幽鳥背泉栖靜境  
遠人當燭想遺文  
暫來此地歇勞足  
望斷故山滄海瀆

送宗禪師

衡陽一別十三春  
行脚同來有幾人  
老大却思歸嶽寺  
當時來漆祖師身

送蜀僧

萬里獨行無弟子  
惟齋筠竹與檀龕  
看經更向吳中老  
應是山川似劍南

過僧竹院

一生愛竹自未有每到此房歸不能高人留宿話禪後  
寂寞雨堂空夜燈

送僧

草履初登南客船銅餅猶貯北山泉衡陽舊寺秋歸後  
門鎖寒潭幾樹蟬

文益

覩木平和尚

木平山裏人貌古言復少相看陌路同論心秋月皎壞  
衲線非蠶助歌聲有鳥城闕今日來一漚曾已曉

看牡丹

擁毳對芳叢由來趣不同髮從今日白花是去年紅艷  
色隨朝露馨香逐晚風何須待零落然後始知空

可止

山居

雪消春力展花漫洞門垂果長纖枝曲巖崩直道移重

猿圍淺井鬪鼠下疎籬寒食微燈在高風勢徹波

送僧

四海無拘繫行心興自濃百年三事衲萬里一枝筇夜減當時影春消過雪蹤白雲深處去知宿在何峰

哭賈島

燕生松雪地蜀死葬山根詩僻降今古官卑悵子孫塚闌寒月色人哭苦吟魂暮雨滴碑字年年添蘚痕

清江

大歷時人與  
章八元倡和

夕次襄邑

何處戒吾道經年遠路中客心猶向北河水自歸東古  
戍鳴寒角疎林振夕風輕舟惟載月那與故人同

嚴秘書宅會章八元

佳期曾不遠甲第即南隣惠愛偏相及經過宣獻頻秋  
寒林葉動夕霽月華新莫話羈栖事平原是主人

送堅上人歸杭州天竺寺

十年勞負笈經論化中朝流水知鄉近和風惜別遙雲

山零夜雨㟁浦上春潮歸卧南天竺禪心更寂寥

送贊律師歸嵩山

禪意歸心急山深定易安清貧修道苦孝友別家難雪  
路侵溪轉花宮映嶽看到時瞻塔暮松月向人寒

上都訓童十八兄

每歎經年別人生有幾年關河長問道風雨獨隨緣寓  
蝶成莊夢懷人識補賢徽猷不及此空愧白華篇

湘川懷古

瀟湘連汨羅復對九疑河浪勢屈原塚竹聲漁父歌地  
荒征騎少天暖浴禽多脈脈東流水古今同奈何

精舍遇雨

空門寂寂淡吾身溪雨微微洗客塵卧向白雲情未盡  
任他黃鳥醉芳春

法照

送無著禪師歸新羅國

萬里歸鄉路隨緣不算程尋山百衲敝過海一杯輕夜

宿依雲色晨齋就水聲何年持貝葉却到漢家城

寶月

行路難

君不見孤雁關外發酸嘶度楊越空城客子心腸斷幽  
閨思婦氣欲絕凝霜夜下拂羅衣浮雲中斷開明月夜  
夜遙遙徒相思年年望望情不歇取我匣中青銅鏡倩  
人為君除白髮行路難行路難夜聞南城漢使度使我  
流淚憶長安

廣宣

駕幸天長寺應制

天界宜春賞禪門不掩關宸遊雙闕外僧引百花間車  
馬喧長路煙雲淨遠山觀空復觀俗皇鑒此中閒

九日菊花詠應詔

可訝東籬菊能知節候芳細枝青玉潤繁榮碎金香爽  
氣浮朝露濃姿帶夜霜泛杯傳壽酒應共樂時康

聖恩顧問獨遊月磴閣直書其事應制

禪居河畔無多地來往尋春物正華磴道上盤千畝竹  
欄干低壓萬人家簷前施飯來飛鳥林下行春踏落花  
自解剎那知佛性不勞更喻幾塵沙

安國寺隨駕幸興唐觀應制

東林何殿是西隣禪客垣牆接羽人萬乘遊仙宗有道  
三車引路本無塵初傳寶訣長生術已證金剛不壞身  
兩地盡修天上事共瞻鑾駕重來巡

石倉歷代詩選卷一百七